

Lafitte-k izkribu bat irakurri du. Dio, Euskal autore klasikoan antologia bukatzen danean, Euskal itzen bereizkuntzak zeatz egiteko batzorde bat sortzea komeni litzakeala. Batzarrekoai gauza egokia eta egin beharrekoa iruditu zaie.

Dirassar-ek dio nola bialdu zaien Bidasoaz gorako laguntzaileai orri bat zenbait galdera egiñik eta orainarte artu diran erantzunen kontu eman du.

Bertsolari txapelketez berriketa bat egin da. Nafarroakoa Igantzi-n asiko da maiatzaren 15-ean eta Bizkaikoa Euba-n maiatzaren 1-can.

Irigoyen Bilbon zabaltzeko bidean dagoen eskolaz mintzatu da. Bizkaiko Diputazioaren laguntasuna eta bultzada lortzeko modua omen dago.

Esan du, gaiñera, gazte batzuk urbildu zaizkiola «Krisellu» izenarekin euskal teatro talde bat sortzeko asmoz eta nahi luketela Euskaltzaindiaren etxean egon. Aresti-k itz egin du gero talde orren berri emanik eta nolako asmoak dituzten adierazirik. Gaiñera Euskaltzaindiari, asierako gastuetarako, iru milla pezeta aurreratzeko eskatu dio. Ontzat artu da guztia.

Gero berriketa bat egin da Bilboko eta Iruñeko egunerokoetan euskerazko artikulua argitaratzeko sortu dan giroaz.

Arregi Euskaldunen alfabetizazio kanpañaz mintzatu da eta nola dijoan antolatzeari jakiniarazi du. Alde batetik gaiak prestatzea eta bestetik nola gertatu errietako gauzak. 1. Gaija amabi leziotan prestatu omen diteke. 2. Bakoitza euskalkitik asi eta beste euskalkiak eta batasun beharra ezaguterañio. 3. Urriari asi diteke zenbait erritan eta orretarako Donostian egin diteke udan irakasleak prestatzeko billera bat. Oso ondo iruditzen zaie asmoa bildutako guztiei.

Besterik gabe oi dan otoiñez asi eta bukatu da batzarrea.

*Euskaltzainburuordea*

L. DASSANCE

*Idazlariordea*

ALFONSO IRIGOYEN

Donostian, Diputazioan, 1966 apirillaren 29-an.

Bildu dira: Irigaray, buru, Zavala, Arrue, Labayen, Larzabal, Satrustegi, San Martin, Villasante, Lafitte, Haritschelhar eta Irigoyen euskaltzainiak. Oregi, Altuna, Zatarain, Loidi, Oleaga, Eizmendi, Arkotxa, Artola, Juan Garmendia, Aresti eta Etxaniz laguntzaileak.

Dassance, Eppherre, Dirassar eta Gereño-k ezin etorria adierazi dute.

Bergara-ko Ayuntamentuak eskatzen digu maiatzaren 30-ean erri artan egiteko alderdi artako bertsolarien txapelketa. Egin bedi.

Loyola-ko Filosofia Fakultadearen erretoreak eskatzen digu iraillean Euskaltzaindiaren batzarrea erri artan egiteko Larramendi-ren gorazarrea ospatuaz. Egin bedi.

Gure batzarrean dago William C. M. Browy jauna bere emaztearekin. Norteamerikanoak dira. Berriketa atsegin bat izan dugu aiekin. Euskeraz ikasten ari da Getaria-n. Irigaray-k aipatu du University of Idaho-k «Amigos del Pais»-ekoai bialdu dien karta zenbait gauza eskaturik prestatzen ari diran euskal gaien bibliotekarako.

Udarregi-ren omenaldi antolatzaileen izenean Jose Anton Arza-k egingo danaren programa bialtzen digu, gure izenean norbait joan dedin eskatuaz. Badaude batzuk arako asmotan diranak eta berak izan bitez gure ordezkariñza dutenak. Bide batez Xenpelaar sariak eman ditezke egun batean ondo iruditzen bazaie antolatzaileai.

Berriketa bat izan da magnetofonoan ahozko euskal gaiak biltzeaz. Haritschelhar-ek dio kuestionario bakar bat prestatu behar litzakeala, batez ere atlas linguistikoari dagokion puntuan, lana debaldetan ez egiteko.

Libreria Manterola-k «Orixe» liburua eskeintzen digu eun pezetan alea. Ogei eros bitez.

Juan Garmendia-k Orixe-ren illobia egitea nola dijoan adierazi du izkribu bat irakurriaz.

Arrue-k esan du aurten dala Kirikiño jaio zala eungarren urtea eta zerbait egin behar litzakeala bere omenez. Badakigu Durango-ko Gerediaga alkartadekoak ere zerbait egiteko gogoz daudela eta itz egin bedi aiekin ia zer prestatu genezakean batera.

Aresti-k dio urte bi barru dala berrogetaamargarren urtea Euskaltzaindia sortu zala eta ospatzeko modurik egokiena lan baliozkoen bat eginda edukitzea izango litzakeala.

San Martín-ek Eibar-en egingo diran Euskal Liburu eta Diskoan Feria eta Umeen Euskal Jaiaz aritu da. Juradu bat izendatu behar dugula eskatu du euskal sariketa baterako. Izan bitez bera Etxaniz eta Julene Azpeitia.

Loidi-k lan bat irakurri du Euskaltzaindiaren lanak zeintzuk izan ditezkean adieraziaz. Oleaga-k eskatu du Bizkaiko euskaltzain eta laguntzailleak biltzeko baime-na batzorde lanen berri emateko eta nor zertan aritu ditezkean jakiteko. Ala egin bedi.

Lafitte-k itzen bereizkuntzaz aurkeztatu zuena oiñarri artuta iztegi gaia atera da eta berriketa luzea egin da ortaz, iritzi asko agertuaz. Azkue-ren iztegiak gaiñera Euskaltzaindiak euskal iztegi bat behar luke itz bakoitzaren zeaztasunak euskeraz adierazirik. Ortarako Haritschelhar-ek eskatzen du urrengo batzarrean tratatu behar diran gaien artean iztegiaren lendabiziko letrak jartzeko: *a* eta *aa*. Eta batzarrea amar ta erdietan asteko. Ala egin bedi. Mitxelena jaunarekin iztegiak itz egiteko San Martin, Irigoyen eta Oleaga izendatu dira.

Xenpelar sariak emateko izendatu ziranak bildu dira eta onela partitzea erabaki dute:

1. Manuel Matxain, Salbatore Mitxelena zanari jarritako bertsoakatik, kontuan izanik gaiñera beste sorta on asko aurkeztatu dituela.
2. Inozenzio Olea, eiztariari jarritako amalau bertsoakatik.
3. Jesus Lete «Ibai-ertz», asto bati jarritako amasei bertsoakatik.
4. Gillermo Albizu, bildots bati jarritako amalau bertsoakatik.

Jakinerazi bedi nola aurten ere Xenpelar eta Lizardi sariak emango diran. Lanak azaroaren ogeirarte bialdu ditezke. Bertso papelez gaiñera aldizkarietan argitaratutako bertsoak ere ontzat artuko dira gutxienez sei ale edo zati bialduaz. Gaiñerako guztia orainarte bezala.

Besterik gabe oi dan otoitzarekin asi eta bukatu da batzarrea.

*Euskaltzainburordea*  
A. IRIGARAY

*Idazlariordea*  
ALFONSO IRIGOYEN